
ВИЛОЯТ ҲОКИМИНИНГ ЎРИНБОСАРИ ФАЙЗУЛЛО ҚОСИМОВ ТОКИОДА ЯПОНИЯ ТАШҚИ ИШЛАР ВАЗИРИНИНГ ПАРЛАМЕНТАР ЎРИНБОСАРИ ТАРО ХОНДА БИЛАН УЧРАШДИ

Фарғона вилояти таълим соҳаси делегацияси раҳбари сифатида Японияда бўлиб турган вилоят ҳокимининг ўринбосари Файзулло Қосимов Токиода Япония ташқи ишлар вазирининг парламентар ўринбосари Таро Хонда билан учрашди.

Ўзбекистоннинг Япониядаги фавқулодда ва мухтор элчиси Муҳсинхўжа Абдурахмонов ҳам иштирок этган учрашувда икки томонлама ҳамкорлик алоқаларини ривожлантириш истиқболлари муҳокама қилинди.

Япониянинг илғор ва уникал таълим тизими билан танишиш ҳамда бу тажрибанинг ўзбек менталитетига уйғун қисмидан Фарғона вилоятида таълим соҳасини ривожлантиришда фойдаланиш кўзда тутилаётгани маълум қилинди.

Шунингдек, Ўзбекистон ва Япония ҳудудлари ўртасида тўғридан-тўғри ҳамкорлик алоқалари фаол ривожланиб бораётганлиги мамнуният билан қайд этилди. Ушбу ташриф доирасида вилоятимиз делегациясининг Токио, Такасаки, Осака ва Майзуру шаҳарларида икки томонлама музокаралар ҳам ўтказиш режалаштирилгани таъкидланди.

Риштон тумани билан Япониянинг Майзуру шаҳри ўртасида 2019 йилда ҳамкорлик меморандуми имзоланиб, унинг ижроси коронавирус пандемиясига ҳам қарамай жадал равишда ривожланиб бораётганлиги, жорий йилнинг апрель ойида Элчи Муҳсинхўжа Абдурахмоновнинг Осака префектурасига ташрифи доирасида Фарғона вилояти ва Осака префектураси ўртасида ҳамкорлик алоқаларини ўрнатиш масаласи муҳокама қилинганлиги, жумладан Фарғона вилояти делегациясининг Осакага ташрифини амалга ошириш бўйича келишувга эришилганлиги билдирилди.

Вазир ўринбосари Хонда Таро ҳам икки давлат ўртасида ҳамкорлик алоқаларини ривожлантиришда ҳудудлар ўртасида тўғридан-тўғри муносабатларни ўрнатиш муҳим аҳамият касб этишини таъкидлаб, Фарғона ва Осака ўртасида ўзаро алоқалар ўрнатилишида амалий кўмак беришга тайёрлигини билдирди.

Учрашув якунида томонлар барча соҳаларда ўзаро манфаатли алоқаларни қўллаб-қувватлашга келишиб олдилар.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-06-13 19:03:19